

清史列傳

冊四



清史列傳 卷四

大臣畫一傳檔正編一

費英東

費英東姓瓜爾佳氏世居蘇完後隸滿洲鑲黃旗驍果善射引強弓十餘石太祖高皇帝勦業之初隨其父蘇完部長索爾果首率所部軍民五百戶來歸太祖嘉之授一等大臣尙主有兌沁巴顏者費英東女兄之夫也謀逆費英東擒而誅之初征瓦爾喀部取噶嘉路殺部長阿球降其衆以歸戊戌年正月同台吉褚英等統兵千人再征瓦爾喀取安楚拉庫路圍屯寨二十餘所屬人戶悉招降之丁未年正月斐悠城長苦烏拉侵擾請內附費英東同貝勒舒爾哈齊等遷之盡收其環城屯寨令侍衛扈爾漢護五百戶先歸烏拉以兵追擊相持未下費英東率師繼至大敗之五月討東海渥集部與貝勒色雅喇等取赫席赫路鄂摩和蘇魯路佛訥赫託克索路俘二千人而還辛亥年七月同台吉阿巴泰等取烏爾固辰穆稜二路癸丑年正月從太祖征烏拉同諸貝勒大臣力戰破敵乘勝奪門遂拔其

城尋命與何和哩額亦都扈爾漢安費揚古爲五大臣佐理國事天命四年二月明兵四路來侵一軍據薩爾濟山巔費英東率本旗兵進擊破之太祖之征明取撫順也明兵來援礮驚費英東馬旁逸諸軍不前費英東廻馬大呼揮諸軍並進遂破之太祖拊髀歎曰萬人敵也從攻葉赫城上矢石雨下太祖命之退對曰我兵已薄城下矣再命之退對曰勢垂克必不退竟拔其城費英東自少從太祖征討諸國三十餘年身先兵士衝突堅陣當其鋒者莫不披靡性忠直遇事敢言毅然不撓以功授三等子世襲五年三月卒年五十有七太祖聞之哀慟親臨其喪太宗文皇帝天聰六年追封直義公配享太廟八年以其子察喀尼襲爵賜勳免死二次太宗嘗諭羣臣曰費英東見人不善必先自斥責而後劾人見人之善必先自獎勵而後舉之被劾者無怨言被舉者亦無驕色朕未聞諸臣以善惡直奏似斯人也順治十六年世祖章皇帝念佐命勳臣詔晉費英東世爵爲三等公康熙九年聖祖仁皇帝御製碑文勒石紀勳雍正九年世宗憲皇帝加封號曰信勇乾隆四十三年上追念費英東忠勳晉世爵爲一等公

額亦都

額亦都姓鈕祜祿氏世居長白山後歸太祖高皇帝隸滿洲鑲黃旗幼時父母爲人所害額亦都以鄰人匿之得免年十三手刃其仇避走嘉木瑚地依於其姑居數歲太祖過其地額亦都識爲眞主請事太祖白於姑姑止之不可遂從行歲癸未從太祖討尼堪外蘭於圖倫城先登攻色克濟城掩敵無備取之又別率兵攻舒勒克布占克其城額亦都驍果善戰挽弓十石能以少擊衆所向克捷太祖知其能日見信任丁亥年八月命督兵取巴爾達城至渾河河漲不能涉以繩聯軍士魚貫而渡夜薄其城率驍卒先登城中兵猝驚起拒跨堞而戰飛矢貫股著於堞揮刀斷矢戰益力被五十餘創不退卒拔其城而還太祖迎於郊燕勞之其所俘獲悉以賜遂賜號巴圖魯薩克察之入寇也額亦都率數人禦敵大敗之夜入其城進攻連克尼瑪蘭城及章嘉城索爾瑚寨功最師還上迎勞如初界藩有科什者以勇聞盜九馬遁額亦都單騎追斬之盡返所盜馬家穆瑚之貝勒揮巴顏謀叛附哈達命討之誅其父子五人以還癸巳年九月葉赫九國之師來侵太祖陳兵古埒山命額亦都以百騎挑戰敵悉衆來犯奮擊殪九人敵卻大兵繼之斬葉赫貝勒布齊九國之師皆潰遂乘勝略諾賽寨及兆嘉村會我軍有齊法罕者

戰歿額亦都直入敵陣以其尸還訥殷路者九國之一也其長收穩色克什既敗歸復聚七寨之衆據守佛多和山命同理事大臣噶益等以兵千人圍其寨三月下之斬收穩色克什上賜所乘馬以旌其勞丁未年五月同大臣費英東隨貝勒巴雅喇征東海渥集部有功庚戌年十一月命招撫窩集部之那木都祿綏芬寧古塔尼瑪察四路降其長康果哩等十九人師旋乘勝擊取雅攬路俘萬人而還辛亥年十二月同額駙何和哩等征渥集部之呼爾哈路克扎庫塔城天命二年同內大臣安費揚古攻明馬哈單花豹衝岔兒堡並克之四年明經略楊鎬率六總兵統兵二十餘萬分四路來侵大貝勒代善出禦明總兵杜松王宣趙夢麟兵於撫順過扎喀關議駐師僻地以俟太祖太宗文皇帝時爲四貝勒謂界藩山有築城夫役急往護之宜耀兵向敵以壯夫役士卒之膽不當駐僻地示弱衆議未決額亦都曰貝勒之言是也遂進師界藩會太祖大兵亦至指揮夾擊大破明兵於吉林崖及薩爾濟山明三總兵皆歿於陣還破明總兵馬林於尙閒崖劉綎於阿布達哩岡額亦都皆在事有功連歲太祖親征各部之不用命者若哈達輝發烏拉葉赫以次削平額亦都在行間輒爲軍前鋒用兵垂四十餘年未嘗挫衄每

克敵受賜輒分給將士之有功者不以自私太祖特優遇之當天命建元之初國人有私訴於額亦都者額亦都擅自聽斷太祖以大臣不應聽受私訴恐一人獨斷必至生亂因罪額亦都并著爲禁令然心知其忠誠寵顧不少衰初妻以宗女後尙和碩公主與費英東等同爲五大臣佐理國政累官至一等內大臣授爵一等子天命六年卒於官年六十大祖親哭之慟祭葬如禮太宗文皇帝天聰元年追封宏毅公配享太廟議功以其子遏必隆襲一等子世祖章皇帝復建碑墓道用表勳焉

扈爾漢

扈爾漢姓佟佳氏世居雅爾古寨後隸滿洲正白旗太祖高皇帝戊子年從其父扈喇虎率所屬來歸恩遇之賜姓覺羅尋授一等大臣居五大臣之列扈爾漢感上撫育恩誓以戎行效死每出戰輒爲前鋒瓦爾喀部斐悠城長策穆特黑者苦烏拉貝勒布占泰之虐請內附上命扈爾漢隨貝勒舒爾哈齊往徙之扈爾漢以兵三百護五百戶先行烏拉聞之遣萬人邀諸路扈爾漢結寨山巔分百人衛降者身率二百人與烏拉軍相持不下翌日敵悉衆來戰同揚古利擊卻之丁未年

從貝勒巴雅喇等征東海渥集部有功己酉年復率兵千人征渥集部所屬渾野路盡降其部落收二千戶而還太祖嘉之賞甲冑駟馬賜號達爾漢辛亥年同何和哩等征渥集部之虎爾哈路圍扎庫塔城三日攻克之癸丑年從征烏拉乘勢奪門遂克其城天命元年同安費揚古統兵二千征東海薩哈連部至兀爾簡河刳舟二百水陸並進收河南北三十六寨黑龍江北十一寨又招降使犬諾洛石拉忻諸部長四年明兵四道來侵扈爾漢從擊撫順開原二路大敗其衆明總兵劉綎復由寬奠口進董鄂扈爾漢先奉命率大兵千人伏山隘以扼其衝衆貝勒繼至引左右兩翼兵夾攻綎倉卒不及陣殲其兵五萬人綎戰死先是扈爾漢率兵往禦董鄂路遇明遊擊喬一琦擊敗之一琦奔孤拉庫崖朝鮮營自縊死明年上復征明扈爾漢從又擊敗明總兵賀世賢等軍於瀋陽歷加世職至三等總兵官六年十月卒年四十八太祖親臨哭之以其子準塔襲

佟養正 子佟圖賴

佟養正遼東人其先爲滿洲世居佟佳以地爲氏祖達爾哈齊以貿易寓居開原繼遷撫順遂家焉天命初佟養正有從弟佟養性輸誠太祖高皇帝於是大軍征

明克撫順修養正遂挈家并族屬來歸隸漢軍六年從征遼陽以功授三等輕車都尉世職奉命駐守朝鮮界之鎮江城時城守中軍陳良策潛通明將毛文龍詐令諜者稱兵至各堡皆呼諜城中大驚良策乘亂據城叛修養正被執不屈死之長子修豐年并從者六十人俱被害詔以次子修圖賴襲世職修圖賴初名修盛年後改今名天聰五年太宗文皇帝征明圍大凌河破監軍道張春援兵修圖賴以從征有功晉二等輕車都尉崇德三年授兵部右參政五年隨睿親王多爾袞圍錦州取白官兒屯臺六年隨鄭親王濟爾哈朗復圍錦州取金塔口三臺七年攻松山城明人突出騎兵奪我紅衣礮修圖賴擊敗之又敗山口步兵克塔山杏山諸臺遂下其城二論功晉一等輕車都尉始分漢軍爲八旗修圖賴隸鑲黃旗授正藍旗都統是時軍士多奉命分略明邊地修圖賴以爲不如深入明境直取燕京乃與都統李國翰等奏言天意歸於聖主大統攸屬明國人心搖動當因天時順人事攻拔燕京控扼山海則萬世鴻基由此而定上以大兵不取關外四城何能卽克山海優旨開諭之八年隨鄭親王收前屯衛中後所二城加一雲騎尉世職順治元年調鑲白旗都統同都統巴哈納石廷柱招降山東四府七州三十

二縣七月下太原招降九府二十七州一百四十一縣師還賜白金四百兩尋隨豫親王多鐸剿流賊李自成屢破賊衆於黃河岸毀其柵獲戰艦十五遂平河南二年五月軍次江南敗明舟師於揚子江先後攻揚州及嘉興諸府皆下之晉爵二等男賜蟒服黃金三十兩白金千五百兩五年授定南將軍與都統劉之源率左翼漢軍駐寶慶時湖廣賊渠馬進忠等寇衡湘辰永間陷寶慶佟圖賴至擊破賊衆進拔其城六年鄭親王率師征湖廣佟圖賴分兵趨衡州所向皆捷陣斬偽總兵陶養用破偽伯胡一清等七營兵於城南乘勝疾擊連破賊兵於望公嶺山峪口一清窮竄集潰衆萬餘距廣西全州三十里立六營以自保又破之遂下全州還師駐衡州賊犯常寧遣佐領陳天謨等馳剿之戰於石鼓洞賊衆大敗斬其渠二人八年凱旋賜宴得優賞尋授禮部侍郎復調正藍旗都統疊奉恩詔晉秩至三等子世襲十三年八月引疾乞休世祖章皇帝篤念前勞命加太子太保以原官致仕十五年卒於家年五十有三上聞之輟朝震悼予祭葬如典禮贈少保兼太子太保諡勤襄康熙十六年聖祖仁皇帝以孝康皇太后推恩所生特贈佟圖賴一等公爵令其子佟國綱承襲並令改隸滿洲雍正元年追封佟養正一等

公諡曰忠烈詔祀昭忠祠與佟圖賴並加贈太師明年勅建佟圖賴專祠賜額曰功崇元祀

西喇布 子瑪喇希

西喇布世居完顏以地爲氏太祖高皇帝時率所部來歸常翼衛太祖列理事十大臣癸巳年富爾佳齊之役哈達西忒庫以兩矢射叔貝勒西喇布並奮身當之中創而沒卹贈二等輕車都尉後定八旗佐領俾其子噶祿瑪喇希隸滿洲鑲紅旗噶祿襲世職從征沙嶺有功加二等輕車都尉卒無嗣天聰九年太宗文皇帝命免功臣徭役瑪喇希以父功授佐領並襲其兄二等輕車都尉崇德二年隨都統葉克舒等征卦勒察有功明年七月任刑部理事官八月擢蒙古副都統又明年授都統尋隨睿親王多爾袞等圍錦州坐阿徇王貝勒等私遣官兵歸家離城遠駐論罪罰贖復隨貝勒阿爾泰等證明奪黃崖口入長城所至克捷七年部臣奏大軍擊明總督洪承疇時瑪喇希承勸護軍統領噶布喇敗走罪狀任其狡辨不能確審應請議罪上命免之順治元年四月隨睿親王多爾袞自山海關破流賊李自成復追擊至望都十二月與都統阿山征陝西自蒲州渡河擊斬賊衆敘

功加一等輕車都尉兼雲騎尉尋奉命移師往會豫親王多鐸南征二年五月自歸德渡河率衆奪泗北淮河橋明守泗總兵焚橋遁走大軍遂夜渡瑪喇希與都統宗室拜音圖以紅衣礮攻克武岡寨引兵而東擊敗明守將黃蜚等步兵數萬於常州下宜興進攻崑山途遇明水軍戰艦擊破之值都統恩格圖等列礮攻崑山縣城瑪喇希率所部兵趨頹堞先登遂拔崑山克常熟師旋晉三等男四年八月隨定遠大將軍肅親王豪格西征軍至漢中叛將賀珍遁走西鄉縣瑪喇希與都統鼇拜分兵馳擊躡及於楚湖斬獲甚衆敘功加二等男五年以失勘冒功妄爭之參領希爾根罪論罰贖得旨寬免會睿親王出獵瑪喇希坐與都統噶達渾等私行射獵鐫秩一等八年世祖章皇帝親政瑪喇希訟削秩冤詔復職贈其父西喇布兼一騎都尉兩遇恩詔晉三等子九年九月奉敕偕定南將軍護軍統領阿爾津平定廣東十月調鎮漢中十二月復調征湖廣辰常諸賊十一年以病卒賜祭葬越明年上復追念西喇布之效命於太祖也賜諡順壯視一品大臣例立碑墓道賜瑪喇希諡忠僖子瑪爾漢襲爵

覺羅拜山滿洲鑲黃旗人景祖翼皇帝第五弟寶郎阿之曾孫也天命六年從太祖高皇帝征明攻瀋陽斬其驍將號秃尾狼者明兵自城南悉衆來戰復斬一副將降其衆既克遼東授三等輕車都尉世職天聰元年從攻錦州不下環守之復移師往攻寧遠錦州兵潛出躡我軍後拜山與佐領巴希爭先還擊奮戰歿於陣太宗文皇帝親臨其喪酌酒哭之賜人戶牲畜贈三等男子顧納岱襲爵崇德三年從征明擊敗明兵於山海關追奔至豐潤又敗之時我軍有出取芻束者爲敵所乘顧納岱馳往奮擊援衆以歸至山東敗明內監馮永盛總兵侯應祿軍攻博平克之晉爵一等男世祖章皇帝順治元年四月顧納岱以護軍統領隨睿親王多爾袞入山海關擊流賊李自成兵十月復隨豫親王多鐸追流賊至陝州賊據山爲陣顧納岱與護軍統領圖賴率兵馳擊斬獲過半三年二月賊將劉元亮以兵千餘乘夜窺我營中有備出擊敗之於是鑲黃正藍白三旗兵協力進攻賊騎奔竄遂克潼關賊逼西安敍功加一雲騎尉三月隨豫親王徇河南乘勝渡淮四月至揚州與護軍統領伊爾都齊等軍於南城獲船二百餘明日合師薄城下七日拔之又敗明帥黃得功舟師於蕪湖貝勒博洛徇蘇州顧納岱破敵於江涇還

克崑山攻江陰大兵以紅衣礮擊破其城顧納岱先登移兵趨浙江敗明守將水陸兵於平湖收其戰艦進攻嘉興明兵悉衆出戰背城結陣顧納岱與都統恩格圖漢岱等合擊之三戰三捷七月旋師明年敍功晉三等子會蘇尼特部騰機思等叛奔喀爾喀顧納岱隨豫親王率兵往剿騰機思等遁走分遣蒙古追擊敗之於歐特克山復自土喇河西行擊敗喀爾喀兵於查濟布喇克尋以恩詔晉二等子世襲五年隨征南將軍譚泰討叛鎮金聲桓至九江大破逆將吳將軍進攻南昌中礮歿於陣卹贈一等子命其子莫洛渾襲莫洛渾歷官一等侍衛順治十七年授參領從安南將軍達素討海寇鄭成功攻廈門力戰死康熙二年聖祖仁皇帝念拜山顧納岱皆陣亡莫洛渾又以戰歿嘉其世篤忠貞特贈莫洛渾爵三等伯立碑墓側諡剛勇無嗣從弟諾爾遜席特庫分襲世職

武理堪 子武拜

武理堪姓瓜爾佳氏世居義屯父伊蘭柱徙居哈達之費德哩太祖高皇帝未滅哈達時武理堪來歸歲癸巳葉赫貝勒布寨糾哈達烏喇輝發科爾沁席北卦爾察朱舍里訥殷諸路兵來侵武理堪奉命偵敵出東道百餘里將陟嶺羣鴉諜集

馬前若阻其行武理堪心異之自度與敵左馳歸以告復奉命出扎喀路薄暮至
渾河敵營河北方會食武理堪擒葉赫一卒訊之言敵衆三萬將乘夜渡沙濟嶺
而進遂攜以還報時夜方半傳諭諸將俟達旦出師我兵有謂敵兵衆者武理堪
宣言曰敵雖衆心不一誰能禦我及戰諸路敵兵果潰布寨爲我兵吳談所殺天
命四年明分兵四路來侵太祖親統師擊之敗其三路兵明經略楊鎬檄總兵李
如柏引兵還瀋陽武理堪率二十騎至呼蘭山見敵軍行山麓乃於山巔駐馬大
呼弓手四顧爲指麾伏兵狀敵望見驚潰武理堪遂縱騎疾馳擊之斬四十人獲
馬五十敵相蹂躪死者千餘初定滿洲旗制武理堪隸正白旗分轄人戶爲佐領
每有征伐任前鋒統領既卒太祖追念曰武理堪從朕摧鋒陷陣幾死者數矣以
其長子武拜襲管佐領事武拜年十六卽隨大軍略明撫順所遇敵輒奮戰矢中
額不顧嘗從太祖出獵有熊突圍上峻嶺太祖遠見一人躍馬射熊貫胸而墮諭
侍臣雅蓀曰是非武拜不能遣視之果然復諭諸皇子曰武拜之勇今共見之矣
遂授侍衛天命四年從征葉赫負重創力戰不退師還賜良馬是時明總兵毛文
龍誘我新附之衆往歸皮島武拜循徼三日擒八十餘人其來誘者乘騎遁追及

射殪之還奏卽以所獲賜之管轄六年從征明破敵於南壽山授騎都尉世職遼城旣下諸將分隸所俘有差太祖以武拜能繼父志年少建功命視一等大臣例隸千人十一年蒙古巴林部貝勒囊努免背盟劫掠武拜隨大軍征之我諜者爲敵困援之出殲敵百人太宗文皇帝初卽位擢列十六大臣佐理鑲白旗事命追捕叛逃蒙古至都爾弼有十五人拒戰武拜旣被創仍奮擊盡殲之太宗諭諸大臣曰是固先帝數嘉許者特予優賚天聰四年大軍取明永平灤州武拜隨貝勒阿敏守永平聞明兵圍灤州率護軍馳援乘夜破明步兵營會阿敏棄永平武拜隨歸逮繫論罪以其曾夜入敵營破敵命釋其縛尋授前鋒參領五年從征明圍大凌河城同參領蘇達喇赴錦州偵敵有斬獲六年從征察哈爾率精銳先驅遇叛逃蒙古五人斬首以獻察哈爾林丹汗攜其丁壯牲畜渡黃河西奔土默特部大軍還克歸化城武拜奉命撫輯降戶八年征明大同額駙多爾濟將中軍前鋒統領圖魯什將左軍武拜將右軍明總兵曹文詔迎戰敗之復同參領席特庫薩海設伏宣府擒明守備殲其游騎尋與承致阿什達爾漢等招察哈爾汗之子額哲及其大臣來歸九年五月明屯兵大凌河西武拜與都統阿山石廷柱圖賴邀

截其歸路陣斬副將劉應選殲步騎五百餘擒遊擊曹得功及守備三人攻克松山城南臺堡師還復設伏敗敵兵敘功晉二等輕車都尉世職是時上遣諸貝勒征明朝州代州忻州命武拜率兵駐上都城舊陞偵軍事會軍中遣使奏捷遂與俱歸崇德元年同前鋒統領勞薩等齎書至喜峯山潘家口諭明守邊將吏斬其邏卒二十三人擒二人獲馬十是年冬上親征朝鮮命同承政馬福塔等率兵三百先行襲其國都尋敗拒戰兵國王李倬潛遁南漢山城大軍進圍之武拜與勞薩殲敵援兵二百餘二年授前鋒統領列議政大臣時參領丹岱阿爾津等往土默特貿易將還遣武拜率將校赴歸化城護之遇明哨卒十六人斬十五人獲馬十九擒一人以還三年四月略明寧遠逐敵墮壕塹斬殪甚衆八月率兵八十人至洪山口遇明兵斬其裨將二擊走羅文峪騎兵五百奪其纛獲馬四十又殲密雲步兵百餘五年與勞薩率兵過中後所略海濱斬級二百獲馬騾牲畜旋受上方略策應圍錦州大軍駐要隘屢擊敗敵兵明年春以大軍攻圍錦州弗力論統帥王貝勒及諸將罪武拜坐罰鍰秋上親征松山明兵敗遁武拜未截擊命拘繫旋釋之七年隨貝勒阿巴泰入明邊敗敵於豐潤三河靜海及通州八年隨鄭親

王濟爾哈朗取明中後所前屯衛是年十一月改任正白旗副都統世祖章皇帝順治元年隨睿親王多爾袞入山海關擊敗流賊李自成追至望都逾年解副都統任列內大臣三年蘇尼特部長騰機思叛武拜隨豫親王多鐸征之斬獲無算四年同輔國公鞏阿岱內大臣何洛會率兵駐防宣府先是兩敍軍功晉一等輕車都尉至是論征騰機思功晉爵一等子屢遇恩詔晉二等伯八年同內大臣羅什博爾輝等舉發英親王阿濟格謀干政事優敘三等侯未幾羅什博爾輝以詔媚諸王造言搆覺伏誅武拜坐附和削職籍沒十五年世祖念武拜戰陣功命復一等子爵世襲罔替康熙四年四月卒年七十賜祭葬如例諡曰果壯子郎坦襲爵別有傳

偉齊 子穆里瑪

偉齊滿洲鑲黃旗人姓瓜爾佳氏費英東第九弟也天命十年太祖高皇帝命同侍衛博爾晉等率兵二千往征虎爾哈收獲五百戶凱旋上郊勞賜宴並念其父索爾和歸附功授騎都尉世職會蒙古逃亡十戶偉齊追之盡俘以歸天聰三年從太宗文皇帝征明畧地至遵化三擒哨卒明兵犯我師偉齊遮擊數逐北論功